



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

Parisiis, 1644

Epistola LXII. Ioannis Papae VIII. Ad VVidonem Episcopvm Inivensem.
Causam Leontardi cuiusdam, qui homicidium cum aliis commiserat, ei
delegat: hortatur, vt quoniam grauissimam illi antea ...

urn:nbn:de:hbz:466:1-15967

quippe consilium non alius adinuenit, nisi ille qui hanc terram conturbare molitur, & ineffabile damnum populo Dei generare versutis fraudibus machinatur: qui pacem & quietem odio habet, & dissensionibus utique gaudet. Quamuis antea Romani* ouilis senatus mortem eligant, quam hanc inauditam & pessimam rem fieri quocumque modo consentiant. Quapropter, quia omnino est impossibile, & tale quid omnis inclytus audiens in maximam suspicionem prorupit, atque simpliciter non fuisse dictum modis omnibus æstimauit: mandamus dilectioni tuæ, quam absentem sicut præsentem amplectimur, ut huc nullo modo fatigeris, quia modo te nullatenus recipere possumus, nec rectum aliquid nunc agendum fore necesse putamus. Cum autem, Deo iuuante, ad vnam concordiam & vnam quietem reipublicæ causa redierit, & litis figmenta, quæ tamquam tela araneorum putamus contra Augustalem maiestatem oborta, sopita extiterint: nos & nobilitatem tuam recipiemus, & ea quæ ad communem vtilitatem pertinere cognouerimus, tecum & tractare, & utpote cum tantæ prudentiæ viro peragere summa dilectione curabimus. Antea autem nullo modo te venire oportet; quia nullo modo te, sicut diximus, recipere felicissime possumus. Data XII. Kalendas Nouembris, indictione XI.

EPISTOLA LXII.

IOANNIS PAPÆ VIII.

AD VVIDONEM EPISCOPVM INIVENSEM.

Causam Leontardi cuiusdam, qui homicidium cum aliis commiserat, ei delegat: hortatur, ut quoniam grauissimam illi antea pœnitentiam constituerat, modo leuiorem constituat.

VVidoni episcopo Iniuensi.

LEONTARDVS quidam tuæ diœceseos homo, singultibus & gemitu tritus sanctam sedem apostolicam, & nostram humilitatem adiit, referens se primo quidem homicidii incidisse reatum; & a sanctitate tua pœnitentiam accepisse, quam & peregerit, & ea peracta, miserationem & reconciliationem ecclesiasticam tuo iudicio promeruerit. Post vero cum aliis suis conciuibus quosdam prædones

publica sanctione iussus sit insequi, vt si eos capere potuissent, modis omnibus interimere non admitterent. Contra quos iste cum aliis proficiscens, asserit quod vno ex illis capto, oculos comprehensores eius eruerint, ac per hoc ipse prædo nefandus vitam finierit. Hoc itaque factò præfatus Leontardus pœnitentiam suscepturus, ad tuam præsentiam veniens, huiuscemodi dixit se fuisse tuo iudicio iudicatum: Sanctam videlicet communionem nisi ad exitum vitæ non percepturum: carnes & vinum, exceptis diebus dominicis, & sanctorum festiuitatibus non sumpturum: comam non rasurum: vxorem non accepturum: cum hominibus non conuersaturum: in cinere & cilicio gemiturum: seruis, rebusque suis non dominaturum: seniore & beneficium non habiturum, & aliis his similibus forte fruendis non fruiturum. Quæ omnia audientes, & intimo corde pensantes, inuenimus aliquid grauius te, quam expedit, si ita est, iudicasse. Huius rei gratia omne huius iudicium tibi dimittimus, & vt nostra super hoc vice ad mitiorem in eo proferendam sententiam perfruaris, modis omnibus exhortamur: quatenus pro amore apostolorum & nostro & laborem itineris, & lacrymabilem prædicti latoris intentionem, vel pœnitentiæ amaritudinem omnino considerans, mitius cum eo agere non detrectes; & eo quod ad sanctos apostolos fecit confugium in his, quæ oportuerit, ne forte in desperationem labatur, misereri illius nunquam omittas; quia Dominus, sicut per prophetam loquitur, misericordiam vult, & non sacrificium. *Osea 6.* Ideoque monemus, rogamus, vt misericordiam ei impendas: quatenus de impensione misericordiæ audientes, sanctitati tuæ multimodas gratias referamus. Optamus sanctitatem tuam in Christo bene valere. Data III. Kalendas Nouembres, indiçtione XI.